

堯山堂外紀

美山堂外紀卷八

晉陵蔣仲舒編

三國

魏

武帝操

字孟德小字阿瞞一名吉利

武帝使盧洪趙達撫軍主刺舉軍中語曰不畏曹公但畏盧洪曹公尚可趙達殺我

武帝與曹洪所乘之馬名曰白鶴時人諺曰憑空

虛躍曹家白鶴

武帝有短歌行曰對酒當歌人生幾何譬如朝露
去日苦多慨當以慷憂思難忘何以解憂唯有
杜康青青子衿悠悠我心但爲君故沉吟至今
明明如月何時可掇憂從中來不可斷絕月明
星稀烏鵲南飛繞樹三匝無枝可依山不在高
水不在深周公吐哺天下歸心

武帝有碣石歌四章一曰龜雖壽其辭曰老驥伏
櫪志在千里烈士暮年壯心不已晉王敦每酒

後輒詠此語以如意打唾壺壺口盡缺

文帝丕

字子桓操長子初爲五官中郎將後嗣位爲丞相魏王稱受漢禪其受禪

碑王朗文梁鵠書鍾繇字謂之三絕

文帝大興軍伐吳爲水軍親御龍舟至廣陵臨江
觀兵會暴風漂蕩幾至覆沒乃賦詩引還其詩
曰西北有浮雲亭亭如車蓋惜哉時不遇適與
飄風會吹我東南行行行至吳會吳會非我鄉
安得久留滯棄置勿復陳客子常畏人

阮元瑜早亡帝傷其妻孤寡爲作詩曰霜露紛兮
交下木葉落兮淒淒候鴈叫兮雲中歸燕翻兮
徘徊妾心感兮惆悵白日急兮西頽守長夜兮
思君魂一夕兮九垂悵延佇兮仰視星月隨兮
天迴徒引領兮入房竊自憐兮孤棲願從君兮
終沒愁何可兮久懷

王宋者平虜將軍劉勲妻也入門三十餘年後勲
悅山陽司馬氏女以宋無子出之帝代宋作詩

二章其一曰翩翩牀前帳張以蔽光輝昔將爾同去今將爾同歸絨歲篋笥裏當復何時披其二曰誰言去婦薄去婦情更重千里不唾井况乃昔所奉遠望未爲遙踟躕不得並

甄皇后文帝后也惠而有色先爲袁熙妻甚獲寵曹公屠鄴令疾召甄左右白五官中郎已將去公曰今年破賊正爲奴後爲郭貴嬪所譖賜死臨終作塘上行曰蒲生我池中其葉何離離傍

能行仁。義莫若妾自知。衆口鑠黃金。使君生別離。念君去我時。獨愁常苦悲。想見君顏色。感結傷心脾。念君常苦悲。夜夜不能寐。莫以豪賢故。棄捐素所愛。莫以魚肉賤。棄捐葱與薤。莫以麻枲賤。棄捐菅與蒯。出亦復苦愁。入亦復苦愁。邊地多悲風。樹木何從修。從軍致獨樂。延年壽千秋。

王既納甄后。孔文舉與曹公書曰。武王伐紂。秋以妲己賜周公。曹公以文舉博學真。謂書傳所記。後見文舉問之。答曰。以今度之。想當然耳。

帝所愛美人薛靈芸常山人也咸熙初習谷出守
常山以千金寶賂聘之以獻至京師帝迎以文
車十乘車徒咽路塵起蔽月時人謂爲塵宵又
築臺高三十丈列燭臺下遠近望之如列星又
爲銅表誌里數行者歌曰青槐夾道多塵埃龍
樓鳳闕望崔嵬清風細雨雜香來土上出金火
照臺靈芸未至京師十里帝望車徒之盛嗟曰
昔言朝爲行云暮爲行雨今非雲非雨非
朝非暮改靈芸名曰夜來夜來妙于鍼工雖處
深帷之內不用燈燭之光裁製立成非夜來縫

製帝則不服宮中號為鉞神按聚末士字是
妖辭銅表誌道是土上出金以燭置臺下則火
在土下漢火德主魏土德王火伏而土與土
上出金是魏滅而晉興之兆晉以金王也

曹植

字子建文帝同母弟封陳王謚曰思
聖運嘗言天下才共一石子建獨得八

斗我得一斗自
古及今用一斗

文帝嘗與陳思王同輦出遊見兩牛在墻間闢一
牛墜井或詔植賦詩不得言牛不得言闢不得
言井不得言或走馬百步要成四十言不成卽
加罪植策馬而馳應口卽成曰兩肉齊道行頭

上戴橫骨行至凶土頭崛起相唐突。二敵不俱剛。一肉卧土窟。非是力不如。盛氣不得泄。賦成步猶未竟。

文帝嘗欲害植以其無罪。令七步中作詩。不成者行大法。植應聲便爲詩曰。煮豆持作羹。漉豉以爲汁。其向釜下然。豆在釜中泣。本是同根生。相煎何太急。帝深有慙色。

一作煮豆燃豆其豆在釜中泣。本是同根生。相

煎何太急

譙樓畫角之曲有三弄相傳爲曹子建作其初弄曰爲君難爲臣亦難難又難再弄曰創業難守成亦難難又難三弄曰起家難保家亦難難又

難

今角音之鳴鳴者皆難字曳聲

子建宜男花頌曰草號宜男旣曄且貞其貞伊何惟乾之嘉其曄伊何綠葉丹花光采晃曜配彼朝日君子耽樂好和琴瑟固作螽斯惟立孔臧福齊太姒永世克昌

初陳思王求甄逸女不遂太祖曰與五官中郎將
植殊不平晝思夜怨廢寢與食黃初中入朝帝
示植甄后玉鏤金帶枕植不覺泣下時已爲郭
后讒死帝意亦尋悟因令太子留宴飲仍以枕
賚植植還息洛水上感而入夢植悲喜不能自
勝因作賦名曰感甄又作蒲生行曰采芰自有
芳不若桂與蘭新人雖可愛無若故所歡行雲
有反期君恩儻中還慊慊仰天歎愁心將何題

日月不恒處。人生忽若寓。悲風來入懷。淚下如垂露。發篋造裳衣。裁縫統與素。植以此篇當石塘上行後。明帝見感甄賦。改為洛神賦。

楊修

字德祖。彪之子。楊震畏四知。楊秉三不惑。楊賜議論切直。楊彪名震四海。孔融

稱為四世清德。修嘗以寶劍與文帝。帝愛其才美。佩之。告左右曰。此楊修劍也。

人餉武帝一柸酪。帝散少許。蓋頭上題合字以示衆。衆莫能解。次至楊修。修便噉曰。公教人噉一口耳。何疑。帝作相。國門自出。看題活字。便去修。即令壞之。曰。門中活。閭字。嫌門大也。

武帝嘗過曹娥碑下楊修從碑背上見題作黃絹
幼婦外孫鰲白八字帝謂修曰解不荅曰解魏
武曰卿未可言待我思之行三十里魏武乃曰
吾已得令修別記所知修曰黃絹色絲也於字
爲絕幼婦少女也於字爲妙外孫女子也於字
爲好鰲白受辛也於字爲辭所謂絕妙好辭也
帝亦記之與修同乃歎曰有智無智較三十里

王粲

字仲宣文帝爲五官中郎將及平原侯
植皆好文學粲與北海徐幹廣陵陳琳

陳留阮瑀汝南應瑒東平劉楨並見友善
號建安七子世目曹子建爲繡虎王仲宣
爲泥下潛蛙鄧艾伏鷲
陸雲隱鷗皆喻其文

王仲宣以西京擾亂依劉表於荊州表以粲貌醜
不甚禮焉粲於是登樓作賦因名仲宣樓時客
荆已久又作七哀詩謂病而哀義而哀感而哀
悲而哀耳目聞見而哀口歎而哀鼻酸而哀一
事而七者具也其辭曰西京亂無象豺虎方遘
患復棄中國去遶身適荆蠻親戚對我悲朋友

相追攀。出門無所見。白骨蔽平原。路有飢婦人。
抱子棄草間。顧聞號泣聲。揮涕獨不還。未知身
處處。何能兩相完。驅馬棄此去。不忍聽此言。南
登霸陵岸。回首望長安。悟彼下泉人。喟然傷心
肝。梁與人共行讀道邊碑人問卿能闇誦乎曰
能因使誦之不失一字觀人圍棋局壞聚爲
覆之棋者不信以把蓋局使更以
他局爲之用相北校不悞一道

徐幹

字偉長爲司空軍謀祭
酒掾屬五官將文學

徐幹於清河道中見挽船士新婚與其妻別幹作

詩曰與君結新婚。宿昔當別離。涼風動秋草。蟋蟀鳴相隨。冽冽寒蟬吟。蟬吟抱枯枝。枯枝時飛揚。身體忽遷移。不悲身遷移。但惜歲月馳。歲月無窮極。會合安可知。願爲雙黃鵠。比翼戲清池。劉楨贈徐幹詩曰。步出北寺門。遙望西苑園。細柳夾道生。方塘含清源。輕葉隨風轉。飛鳥何翻翻。乖人易感動。涕下與衿連。幹答詩曰。與子別無幾。所經未一旬。我思一何篤。其愁如三春。雖路

在咫尺。難涉如九關。陶陶諸夏別。草木昌且繁。
是時徐在西掖。劉在禁省云。

陳琳

字孔璋。武帝書檄多琳所作。帝素患頭眩。每讀琳檄。文報喜曰。此愈我病。

文帝爲五官將。時得馬腦。以爲寶勒。美而賦之。命陳琳王粲並作。琳賦曰。爾乃他山爲錯。荆和爲理。制爲寶勒。以御君子。粲賦曰。因恣象形。匪彫匪刻。厥容應規。厥性順直。御世嗣之駿服兮。表駉驥之儀式。

陳琳有飲馬長城窟行曰飲馬長城窟。水寒傷馬骨。往謂長城吏。慎莫稽留太原卒。官作自有程。舉築諧汝聲。男兒寧當格鬥死。何能怫鬱築長城。長城何連連。連連三千里。邊城多健少。內舍多寡婦。作書與內舍。便嫁莫留住。善待新姑嫜。時時念我故夫子。報書往邊地。君今出語一何鄙。身在禍難中。何爲稽留他家子。生男慎莫舉。生女哺用脯。君獨不見長城下。死人骸骨相撐

柱結髮行事君。慊慊心意關。明知邊地苦。賤妾何能久自全。

阮瑀

字元瑀少受學於蔡邕太祖使與陳琳並爲司空軍謀祭酒管記室

武帝雅聞阮瑀名辟之不應連見逼乃逃入山中
帝使人焚山得瑀送至召入帝時征長安大延
賓客怒瑀不與語使就技人列瑀善解音能鼓
琴遂撫絃按節因造歌曲曰奕奕天門開大魏
應期運青蓋巡九州在東西人怨士爲知己歎

女爲悅已。酬恩義。苟敷暢。他人焉能亂爲曲。旣捷音聲殊妙。帝大悅。

應瑒

字德璉。漢泰山太守邵之從子。

應瑒嘗侍五官將集建章臺。丕命諸文學賦詩。瑒應令曰。公子敬愛客樂飲。不知疲和顏旣已暢。乃肯顧細微。贈詩見存慰小子。非所宜。且爲極。誰情不醉其無歸。九百敬爾位。以副飢渴懷。

劉楨

字公幹。七子中。以曹劉爲絕唱。

建安七子唯劉公幹獨爲諸王子所親五官將嘗
宴諸文學酒酣命甄夫人出拜坐中咸伏公幹
獨平視太祖聞之乃收治罪減成輸作署吏楨
嘗有贈從弟詩云亭亭山上松瑟瑟谷中風風
聲一何盛松枝一何勁其寄意如是故雖論作
而不悔云

劉公幹辯敏無對旣坐平視甄夫人配輸作部太
祖至尚方觀作見劉匡坐磨石公問石何如劉

因喻已自理。蹠而答曰：石出荆山，懸巖之顛，外有五色之文，內含卞氏之珍，磨之不加瑩，雕之

不增文，稟氣堅貞，受之自然。顧其理枉屈紆繞

而不得申，公笑釋之。

公幹配輸作部文帝問曰卿何以不謹於文惠楨答

曰臣誠庸短亦由坐下觸目不昧

劉公幹大暑賦云：其爲暑也，羲和稔駕，發扶木，太陽爲輿，達炎燭，威靈參垂，步朱轂，赫赫炎炎，烈烈暉暉，若熾燎之附體，又溫泉而沉肌，獸喘氣

於玄景鳥戢翼於高危農畯捉鋤而去疇織女
釋杼而下機溫風至而增熱歔悒帽而無依披
襟領而長嘯冀微風之來思

繁欽

字休伯少得名於
汝穎爲丞相主簿

繁欽文才機辨長於書記又善爲詩賦有定情詩
曰我出東門遊邂逅承清塵思君卽幽房侍寢
執衣巾時無桑中契迫此路側人我旣媚君安
君亦悅我顏何以致拳拳綰臂雙金環何以致

殷勤約指一雙銀。何以致區區耳中。雙明珠何
以致叩叩香囊繫肘後。何以致契濶繞腕雙跳
脫。何以致結恩情。美玉綴羅纓。何以致結中心。素縷
連雙鍼。何以致結相於金薄晝搔頭。何以致慰別離
耳後。璫瑁釵。何以致答歡悅。純素三條裙。何以致結
愁。悲白絹。雙中衣。與我期何所。乃期東山隅。日
肝兮不來。谷風吹我襦。遠望無所見。涕泣起踟
躕。與我期何所。乃期山南陽。日中兮不來。飄風

吹我裳。逍遙莫誰覩。望君愁我腸。與我期何所。
乃期西山側。日夕兮不來。躑躅長歎息。遠望涼
風至。俯仰正衣服。與君期何所。乃期山北岑。日
暮兮不來。淒風吹我襟。望君不能坐。悲苦愁我
心。愛身以何爲。惜我華色時。中情旣欸欸。然後
尅密期。褰衣躡茂草。謂君不我欺。廁此醜陋質。
徙倚無所之。自傷天所欲。淚下如連絲。

吳質

字季重。以文才爲文帝所善。南皮之遊甚樂。

文帝嘗召質及曹休歡會。命郭后出見質等。帝曰：「卿仰諦視之，其至親如此。」質黃初五年朝京師，詔上將軍及特進以下皆會質所。太官給供具。及文帝崩，質思慕作詩曰：「愴愴懷殷憂，殷憂不可居。徙倚不能坐，出入步踟躕。念蒙聖主恩，榮爵與衆殊。自謂永保身，志氣甫當舒。何意中見棄，棄我就黃墟。哭哭靡所恃，淚下如連珠。隨沒無所益，身歿名不書。慷慨自佷俛，庶幾烈丈夫。」

楊豐

初名和若
字伯陽

楊和若少遊俠常以報仇解怨爲事時人爲之號

曰東市相斫楊阿若西市相斫楊阿若

明帝獻

丕子甄皇后生也后被譖或丕與獻
獵見子母鹿既射其母命獻射其子

獻泣曰陛下已殺其母臣不忍
復殺其子丕釋弓矢爲之惻然

明帝時昆明國獻嗽金鳥形如雀色黃常翱翔於

海上飴以真珠及龜腦常吐金屑如粟鑄之乃

爲器服宮人爭以鳥所吐金爲釵珥謂之辟寒

金以鳥不畏寒也。宮人相嘲弄曰：「不服辟寒金。」
那得帝王心不服辟寒鈿？那得帝王怜。

明帝景初中童謡曰：「阿公阿公駕馬車，不意阿公
東渡河。」阿公東還當奈何？及司馬宣王平遼東，
歸至白屋，當還鎮長安，會帝篤疾，急召之，乃乘
追鋒車東渡河，終翦魏室。

應璩

字休璉，場之弟。明帝時歷官散騎常侍。

朱建平相璩曰：「君年六十二先此一年。」
當獨見白狗？璩年六十一為侍中，直內省，
忽見白狗，衆人悉不見，作急遊觀，飲讌自

娛六十
二卒

應璩古樂府云昔有行道人陌上見三叟年各百
餘歲相與鋤耒耨住車問三叟何以得此壽上
叟前致詞量腹節所受中叟前致辭室內嫗龐
醜下叟前致詞暮卧不覆首要哉三叟言所以
能長久朱子語錄或云俗語夜飯減一口活得
九十九先生曰此出古樂府三叟詩
漢桓帝時有馬子侯者爲人頗癡自謂曉音律黃
門樂人更相嗤謂子侯不知名陌上桑反言鳳

將雛輒搖頭。欣喜多賜左右錢帛。無復慙色。應
璩新詩曰。漢末桓帝時。郎有馬子侯。自謂識音
律。請客鳴笙竽。爲作陌上桑。反言鳳將雛。左右
僞稱善。亦復自搖頭。

程曉

字季明。衛尉安鄉侯昱之孫。以祖功分封列侯。

程曉嘲熱曰。平生三伏時。道路無行車。閉門避暑
卧。出入不相過。今世旆襪子。觸熱到人家。主人
聞客來。顰蹙奈此何。謂當起行去。安坐正咨嗟。

所說無一急。皆含一何多。疲瘞向之久。甫問君
極那。搖扇髀中疾。流汗正滂沱。莫謂爲小事。亦
是一人瑕。傳戒諸高明。熱行宜見呵。

稽康

字叔夜。其先姓虞。會稽上虞人。以避怨徙銍。銍有稽山。家于其側。因而命氏。寓居山陽。貧。報以自給。與魏宗室婚。拜中散大夫。

東平呂安與稽康友善。後安兄巽姦通安妻。乃誣
安不孝。繫獄。辭相證。引因收康。初康採藥山中。
見隱者孫登。謂之曰。子才多識寡。難乎免於今。

之世矣。及是縲紲，乃作詩自責曰：嗟余不敏，好善聞人，欲寡其過，謫議沸騰，性不傷物，頗至恚憎。昔慙柳惠，今愧孫登，內負宿心，外慙良朋。煌煌靈芝，一年三秀，予獨何爲，有志不就，懲難思復，心焉內疚。庶勗將來，無罄無臭。采薇山阿，散髮巖岫，永嘯長吟，顧性養壽。臨刑語人曰：袁孝尼嘗從吾學，廣陵散吾每固之，不與廣陵散于今絕矣。因援琴而鼓，顏色自若。

康與安每相思
千里命駕安後

來值康不在康兄喜出戶庭之不入題門上作鳳字而去喜不覺倚以為忻故作鳳字凡鳥也

阮籍字嗣宗瑤之子性好飲閒步兵厨多美酒乃求為步兵校尉嘗率意獨駕車跡

所窮輒慟哭而返又對人能為青白眼由是禮法之士深所设疾時兵家女有才色

未嫁而歿阮初不識其父兄徑往哭之盡哀鄰家有婦當壚阮與王安豐常從婦飲

阮醉便眠其側夫始殊疑之伺察終無他意其嫂還家籍見與別或譏之曰禮豈為

我輩設也

阮步兵嘯聞數百步登蘇門山有真人樵伐者擁

鄰巖側籍就之箕踞相對疑矚不轉籍因對之

長嘯意盡。退還半嶺。許聞上啗然有聲如數部。
鼓吹林谷傳響。顧看迺向入嘯也。籍旣降。乃假
蘇門先生之論以寄所懷。其歌曰。日沒不周西。
月出丹淵中。陽精蔽不見。陰光代爲雄。亭亭在
須臾。厭厭將復隆。富貴俯仰間。貧賤何必終。又
歌曰。天地解兮六合開。星辰隕兮日月頽。我騰
而上將何懷。蘇門先生卽孫登也。宋潘子真以霜威能折綿風。方欲求酒之句。問黃山谷所從出。山谷曰。勁氣方凝。酒清威正折。綿更肩吾詩也。按晉阮籍大人先生歌有曰。陽

和微弱陰氣竭海凍不流綿絮折吟吸不通寒列列乃知折綿之事始於阮籍

鍾毓

字稚叔弟會字士季繇二子夏侯玄以

為廷尉執玄手曰太初何至於此玄正色曰雖復刑餘之人不可得交

鍾毓鍾會少有令譽年十三文帝聞之語其父鍾

繇曰可令二子來於是敕見毓面有汗帝曰卿

面何以汗毓對曰戰戰惶惶汗出如漿復問會

卿何以不汗對曰戰戰慄慄汗不敢出毓兄弟

父晝寢因共偷服藥酒其父時覺且託寐以觀之毓拜而後飲會飲而不拜既而問毓何以拜

鍾曰酒以成禮不敢不拜又問會何以不拜會曰俗本非禮所以不拜

鍾毓兄弟警悟過人每有朝語未嘗屈蹟毓語會聞有女能作調試共視之於是盛飾共載行至西門一女子笑曰車中央殊高二鍾都不覺車後一門生云向已被嘲鍾愕然門生曰中央高兩頭低毓兄弟多鬚故以此調之

周泰爲新城太守司馬宣王使鍾毓調曰公釋褐政府三十六日擁蓋守兵馬郡乞兒乘小車一

何駛乎。泰曰君名公之子少有文采故守吏職
獼猴騎土牛又何遲也。

司馬景王與鍾毓燕飲時陳羣子玄伯武周子元

夏在坐共嘲毓王以毓父諱戲問曰臯繇何如

人毓對曰古之懿士顧謂玄伯元夏曰君子周

而不比羣而不黨。陳羣太立長陳寔孫也寔子

泰四世於漢魏晉間有重名而其德漸小減時人語曰公慙卿卿慙長

鄧艾

字士載棘陽人年十三隨母至潁川讀故陳太立碑文言爲世範行爲士則

自名範字士則後宗
族有與同者故改焉

鄧艾以口吃不得作幹佐爲稻田守叢草吏而語
稱艾艾晉文王戲之曰卿云艾艾定是幾艾答
曰鳳兮鳳兮故是一鳳

堯山堂外紀卷八終

堯山堂外紀卷九

晉陵蔣仲舒編

三國蜀吳

龐德公

南郡襄陽人龐士元從父也隱居峴山南司馬德操年小十歲兄事之故

呼龐德公諸葛孔明每至公家獨拜床下公初不令止後攜妻子入鹿門山

龐德公有於忽操三章其一曰於忽乎不可以為其又奚為離婁之精夜何有於明師曠之耳聾者亦有爾束王良之手兮後車載之前行險旣

以覆兮。後遂逐其猶來。雖目眈眈心駭兮。顧其
能之安施。委繩墨以聽人兮。雖班輸亦奚以爲。
其二曰。於忽乎。不可以爲。其又奚爲。椽榱桷榱
之累重。顧柱小之柰何。方風雨之晦陰。行者艱
而莫休。居者坐而笑歌。不知墜之忽然兮。其謂
安何。其三曰。於忽乎。不可以爲。其又奚爲。謂雞
斯飛。誰得而羈。謂豕斯突。何取於縛。是皆以食
而得之。吾於饑而後噫。雞兮豕兮。死以是兮。

司馬徽

字德操有知人之鑑龐德公嘗謂諸葛孔明為卧龍從子士元為鳳雛德

操為
米鑑

司馬德操括囊畏謹有以人物問者不辨其高下
每輒言佳其婦諫曰人質疑于君君一皆言佳
豈咨君之意乎答曰如君言亦復佳

諸葛亮

字孔明封武鄉侯其先葛氏琅邪諸縣人後徙陽都陽都先有姓葛者時

人謂諸葛因為氏兄弟並有盛名各在一國瑾仕吳亮仕蜀誕仕魏于時以為蜀得其龍吳得其虎魏得其狗

黃彥承高爽開朗為沔南名士謂孔明曰聞君擇
婦身有醜女黃頭黑面才堪相配孔明許即載
送之鄉里為之諺曰莫作孔明擇婦正得阿承
醜女

諸葛亮躬耕隴畝好為梁父吟其辭曰步出齊城
門遙望蕩陰里里中有三墓累累正相似問是
誰家墓田強古冶子力能排南山文能絕地紀
一朝被讒言二桃殺三士誰能為此謀國相齊

晏子。晏子春秋公孫捷田開疆古冶子事景公
計功而食桃公孫捷曰吾再拜隱虎功可以食
田曰吾杖兵而御三軍者再功可以食古冶子
曰君當濟河鼃啣左驂治潛行水底逆流百步
從流九里得鼃頸功可以食二子曰吾勇不若
子功不逮子取桃不讓是貪也然而不死無勇
也刎頸而死治曰二子死之咎獨不逮又刎頸
而死漢末曹操既殺孔融楊修又送橋衡於荆
州假乎黃祖三子皆天下之望也武侯梁父吟
此設

諸葛亮表都護李嚴嚴少爲郡戢吏用情深尅苟
利其身鄉里爲嚴諺曰難可押李鱗甲

張裕

張裕饒髯鬚蜀先主嘲之曰昔吾居涿郡多毛姓
東西南北皆諸毛也涿令稱曰諸毛繞涿居乎
先主無鬚裕即答曰昔有作上黨潞長後遷為
涿令去官還家時入與書欲署潞則失涿欲署
涿則失潞乃署曰潞涿君一坐絕倒

馬良

字季常襄陽宜城人也先
主稱尊號以良為侍中

馬良兄弟五人並有才名蜀中諺曰馬氏五常白

眉最良季常眉中有白毛故以稱之

河南西四十里澗穀洛三水之交有五門子孫舊
傳馬氏兄弟五人共居此地作五門客舍因以
為名主養猪賣豚故名為之語曰苑中三公館
下二卿五門嚙嚙但聞豚聲

秦密

當時以博識稱諸
葛孔明呼為學士

吳使張溫聘蜀溫問秦密曰天有頭乎密曰有溫
曰在何方密曰詩云乃眷四顧以此推之頭在

西方溫曰天有耳乎密曰天處高而聽卑詩云
鶴鳴九臯聲聞於天若其無耳何以聽之溫曰
天有足乎密曰詩云天步艱難若其無足何以
步之溫曰天有姓乎密曰姓劉何以然曰其子
姓劉是以知之

集密遠遊詩曰遠遊何所見所見邈難紀巖穴非
我鄰林麓無知己虎則豹之兄鷹則鶴之弟困
獸走環岡飛鳥驚巢起猛氣何咆厲陰風起千

望遠遊長太息太息遠遊子。

支謙

吳高僧

吳主權已制江左而佛教未行有支謙者本月支人來遊漢境傳覽經籍莫不精究遍學異書通六國語其為人細長黑瘦眼多白而睛黃時人為之語曰支郎眼中黃形軀雖細是智囊。

周瑜

字公瑾舒人初孫策年十餘歲已交結知名瑜與策同年而小一月便推結分

好策得喬公兩女皆國色策自納大喬瑜納小喬

周公瑾少精意於音樂雖三爵之後其有關誤公

瑾必知之知之必顧時人謠云曲有誤周郎顧

諸葛恪

字元遜瑾之子少有才名吳主權見而奇之曰藍田生王真不虛也及立

登為太子妙選師友乃以張昭子休顧雍子譚陳武子表與恪並為中庶子入講詩書出從騎射待以布衣之禮謂之四友

諸葛瑾為豫州語別駕向臺云小兒知談卿可與

語比往詣恪恪不相見後於張輔吳昭坐中相

遇別駕喚恪咄咄郎君恪因嘲曰豫州乳矣何

咄咄之有答曰表明臣賢未聞其亂恪曰昔唐

堯在上四凶在下答曰非唯四凶亦有丹朱於

是一坐大笑

種面長似驢吳主指使優人牽驢入題其面曰諸葛子瑜時恪亦侍

宴中請筆於題下添寫之驢二字吳主羨其明

敏即以驢賜恪又使太子嘲恪曰諸葛元遜食

馬疾一石恪答曰臣得戲君子得戲父乎吳主

曰可恪曰乞太子食雞卵三百枚吳主問恪曰

入令君食馬矢卿令人食雞卵何

也恪答曰所出同耳吳主大笑

吳主權引蜀使費禕飲使諸葛恪監酒恪以馬鞭

拍禕背甚痛禕啟吳主曰蜀丞相比之周公都

護君侯比之孔子。今有一兒執鞭之士。恪啓曰。君至大國。傲慢天常。以鞭拍之。於義何傷。衆皆大笑。

吳主權嘗燕見費禕。逆勅羣臣使禕至。伏食勿起。禕至。權為輟食。而諸人不起。禕謂之曰。鳳凰來翔。麒麟吐哺。驢騾無知。伏食如故。諸葛恪應聲答曰。爰植梧桐。以待鳳凰。有何燕雀。自稱來翔。何不彈射。使還故鄉。

曾有白頭鳥集吳殿前吳主權問羣臣曰此何鳥也諸葛元遜對云此名為白頭翁張輔吳自以坐中最老疑元遜以鳥戲之因曰恪欺陛下未嘗聞鳥名白頭翁者試使恪復求白頭母元遜曰鳥名鸚母未必有對試使輔吳復求鸚父張不能答一坐大笑

吳主大會將佐命元遜行酒次至張輔吳前張先有酒色

不時肯飲曰此非養老之禮也權謂元遜曰卿但令張公辭屈乃當飲耳元遜即難張曰昔尚父九十秉旄伏鉞猶未告老今軍旅之事將軍在後酒食之事將軍在前何謂不養老張卒無

辭遂為
盡爵

吳主亮初即位以諸葛恪為太傅時公安有白黿
鳴童謠曰白黿鳴龜背平南郡城中可長生守
死不去義無成黿有鱗介甲兵之象也南郡城
可長生者有急易以逃也明年恪敗弟融鎮公
安亦見黿融刮金印龜服之而死

吳建興初又童謠曰吁汝恪何若若蘆葦單衣篋
鉤絡於何相求揚子閣及諸葛恪死果以葦席

累身篋束其腰投之石堦鉤絡鉤帶也楊子閣
者反語石子堦也後聽恪故吏收葬求之此堦
云

薛綜

字仲文瑩之父其先田文封薛因以氏
焉吳主皓追歎綜遺文命榮繼作瑩獻

詩三百

餘言

蜀使張奉於吳主權前列闕澤姓名調澤澤不能
答時薛綜為選曹尚書下行酒因勸奉酒曰蜀
者何也有犬為獨無犬為蜀橫目勾身虫入其

腹奉曰不當復列君吳耶綜應聲曰無口為天
有口為吳君臨萬邦天子之都奉無以對

張純

字元基同郡張儼字子節朱異字季文
吳郡顧陸朱張為四姓三國之間四姓

盛馬舊目云張文
朱武陸忠顧厚

張純少有清才與張儼朱異俱童少嘗同詣驃騎
將軍朱據據聞三人才名欲試之因語曰老鄙
相聞饑渴甚矣夫驥褭以迅驟為功鷹隼以輕
疾為妙其為吾各賦一物然後乃坐純賦席曰

席以冬設簟為夏施揖讓而坐。君子攸宜。儼賦
六曰。守則有嚴。出則有獲。韓盧宋鵲。書名竹帛。
異賦。弩曰南嶽之幹。鍾山之銅。應機命中。獲隼
高墉。三人皆隨。日立成據。大惟悅。

韋昭

字弘嗣。史。音諱。改名曜。少好學。能屬
文。官中書。所撰吳鼓吹曲十二曲。吳

人多言祥瑞。吳主皓問昭曰。此
家人篋篋中物耳。後竟殺昭。

吳鼓吹曲有云。焱精缺者。言漢室衰。孫堅奮迅。猛
志念在匡救。王迹始乎此也。當漢朱鷺其曲曰。

焱精缺。漢道微。皇綱弛。政德違。衆姦熾。民罔依。
赫武烈。越龍飛。陟天衢。耀靈威。鳴雷鼓。抗電麾。
撫乾衡。鎮地機。厲虎旅。騁熊羆。發神聽。吐英奇。
張角破。邊韓羈。宛潁平。南土綏。神武章。渥澤施。
金聲震。仁風馳。顯高門。啟皇基。統罔極。垂將來。
吳鼓吹曲有云。漢之季者。言孫堅悼漢之微。痛董卓之亂。興兵奮擊。功蓋海內也。當漢思悲翁其曲曰。漢之季。董卓亂。桓桓武烈。應時運。義兵興。

雲旗建。厲六師。羅八陣。飛鳴鏑。接白刃。輕騎發。
介士奮。醜虜震。使衆散。劫漢主。遷西館。雄豪怒。
元惡憤。赫赫皇祖功名聞。

吳鼓吹曲有云伐烏林者言魏武旣破荊州順流
東下欲未爭鋒孫權命將周瑜逆擊之於烏林
而破走也當漢上之回其曲曰曹操北伐拔柳
城寨勝席捲遂南征劉氏不睦八郡震驚衆旣
降操屠荊舟車十萬揚風聲議者狐疑慮無成

賴我大皇發聖明虎臣雄烈周與程破操烏林
顯章功名

吳鼓吹曲有云克皖城者言魏武志圖并兼而令
朱光為廬江太守孫權親征光破之於皖城也
當漢戰城南其曲曰克滅皖城遏寇賊惡此凶
孽阻姦慝王師赫征衆傾覆除穢去累戢兵車
民得就農邊境息誅君弔民昭至德

吳鼓吹曲有云章洪德者言孫權章其大德而遠

方未附也。當漢將進酒，其曲曰：「章洪德邁威神，感殊風懷遠鄰。平南裔，齊海濱。越裳貢，扶南臣。珍儔克庭，所見日新。」

賀邵

字與伯，會稽人。晉司空循之父。元帝嘗與循言及吳時事，問孫皓燒鋸，截一賀

頭。是誰循未得言。元帝自憶曰：「是賀邵。」循不涕曰：「臣父遭遇無道，創巨痛深，無以所答。」明詔元帝愧慙，三日不出。

賀太傅作吳郡，初不出門。吳中諸強族輕之，乃題府門云：「會稽雞不能啼。」賀聞，故出行至門，反顧。

索筆足之曰不可啼殺吳兒於是至諸屯邸檢
校諸顧陸罪者甚衆陸抗時為江陵都督故下
請吳主皓然後得釋

末主皓

字元宗一名彭祖大皇帝孫為晉所滅

吳主初從步闡之請遷都武昌揚州之民沂流供
給甚苦之時有童謠曰寧飲建鄴水不食武昌
魚寧還建鄴死不止武昌居陸抗以聞乃還都
建業

吳主遣使者祭石印山下妖祠。使者因以丹書獻曰：「楚九州渚，吳九州都。揚州士作天子，四世治太平矣。」皓聞之曰：「從大皇帝至朕四世太平之主，非朕復誰恣虐踰甚！」

吳主天紀中童謠曰：「阿童復阿童，銜刀游渡江。叶不畏岸上虎，但畏水中龍。」晉武帝聞之以語羊祜。祜曰：「此必水軍有功，但當思應其名者。」時益州刺史王濬小字阿童，乃加濬龍驤將軍及征

吳江西衆軍無過者而濬先定秣陵

晉既平吳武帝引見孫皓帝問皓聞南人好作爾
汝詩頗能為否皓正飲酒因舉觴勸帝曰昔與
汝為鄰今與汝為臣勸汝一盃酒令汝壽萬春
帝悔之

晉平吳後江南有童謠云局縮肉數橫目中國當
敗吳當復又有云宮門柱且莫朽吳當復在三
十年後又有云雞鳴不拊翼吳復不用力于時

吳人皆謂在孫氏子孫故竊發為亂者相繼接
橫目者四字自吳亡至晉元帝興幾四十年皆
如童謠之言元帝懦而少斷局縮肉益直斥之
云

堯山堂外紀卷九終